

2026 ОНЫ СУРГАЛТЫН ТӨЛБӨРИЙН ТЭТГЭЛЭГ ОЛГОХ СОНГОН ШАЛГАРУУЛАЛТЫН УДИРДАМЖ

Нэг. Нийтлэг үндэслэл

- 1.1. Энэхүү удирдамжийн зорилго нь Дорноговь аймгийн хүний нөөцийн хэрэгцээнд үндэслэн тэргүүлэх, эрэлттэй мэргэжлээр дээд боловсролын сургалтын байгууллагын үндсэн хөтөлбөрт суралцагчид сургалтын төлбөрийн тэтгэлэг олгох сонгон шалгаруулалтыг ил тод, тэгш, хараат бус зохион байгуулахад оршино.
- 1.2. Энэхүү удирдамжийг хэрэгжүүлэхэд Монгол Улсын Үндсэн хууль, Хүний хувийн мэдээлэл хамгаалах тухай хууль, Нийтийн мэдээллийн ил тод байдлын тухай хууль, Боловсролын ерөнхий хууль, Дээд боловсролын тухай хууль, Хөдөлмөрийн тухай хууль, Залуучуудын хөгжлийг дэмжих тухай хууль болон бусад холбогдох хууль тогтоомжийг баримтална.
- 1.3. Энэхүү удирдамж нь 2026 онд зохион байгуулах сургалтын төлбөрийн тэтгэлгийн сонгон шалгаруулалт, санхүүжилт, гэрээний хэрэгжилттэй холбоотой харилцаанд үйлчилнэ.

Хоёр. Тэтгэлэгт хамрагдах суралцагчдад тавигдах шаардлага:

2.1. Ерөнхий боловсролын сургууль төгсөгчид

- 2.1.1 Монгол Улсын иргэн байх;
- 2.1.2 Дорноговь аймагт 5-аас доошгүй жил оршин суусан байх;
- 2.1.3 Боловсролын газраас баталсан эрэлттэй, тэргүүлэх мэргэжлийг сонгосон байх;
- 2.1.4 Магадлан итгэмжлэгдсэн сургалтын хөтөлбөрт элссэн байх;
- 2.1.5 Элсэлтийн шалгалтын дундаж оноо 600 ба түүнээс дээш байх;
- 2.1.6 Бүрэн дунд боловсролын үнэлгээний дундаж 80 хувиас доошгүй байх;
- 2.1.7 Төгсөөд Дорноговь аймагт 5-аас доошгүй жил ажиллах гэрээ байгуулах;
- 2.1.8 Батлан даагчтай байх;
- 2.1.9 Амралтын хугацаанд аймагт дадлага хийх.

2.2. Их, дээд сургуулийн суралцагчид:

- 2.2.1 Монгол Улсын иргэн байх;
- 2.2.2 Дорноговь аймгийн нутаг дэвсгэрт байнга оршин суугчаар бүртгэлтэй бөгөөд тус аймагт ерөнхий боловсрол эзэмшсэн, эсхүл өмнө нь 5-аас доошгүй жил оршин суусан байх.
- 2.2.3 Эрэлттэй, тэргүүлэх мэргэжлээр суралцаж байх;
- 2.2.4 Магадлан итгэмжлэгдсэн сургалтын хөтөлбөрт суралцаж байх;
- 2.2.5 Голч дүн (GPA) 3.0 ба түүнээс дээш байх;
- 2.2.6 Ёс зүйн ноцтой зөрчил гаргаж байгаагүй байх;
- 2.2.7 Төгсөөд Дорноговь аймагт 3-аас 5 жил ажиллах гэрээ байгуулах;
- 2.2.8 Амралтын хугацаанд аймагт дадлага хийх.

Гурав. Санхүүжилт:

3.1. Тэтгэлгийг компаниудтай байгуулсан орон нутагтай хамтран ажиллах болон нийгмийн хариуцлагын гэрээнд сургалтын тэтгэлэгт зориулан тусгасан эх үүсвэрээс санхүүжүүлнэ.

3.2. Аймгийн Засаг даргын Тамгын газар нь тэтгэлэг олгох тухай Засаг даргын захирамж, сургалтын байгууллагын албан ёсны нэхэмжлэх, суралцах эрхийн баталгааг санхүүжилт олгогч этгээдэд хүргүүлж, сургалтын төлбөрийг тухайн сургалтын байгууллагын дансанд шууд шилжүүлэх арга хэмжээг зохион байгуулна.

Дөрөв. Сонгон шалгаруулалт:

4.1. Тэтгэлэгт хамрагдах хүсэлтийг 2026 оны 08 дугаар сарын 13-ны өдрөөс 08 дугаар сарын 20-ны өдрийг дуустал цахим хэлбэрээр хүлээн авч, бүртгэнэ.

4.2. Сонгон шалгаруулалтыг аймгийн Засаг даргын захирамжаар байгуулсан ажлын хэсэг зохион байгуулна. Ажлын хэсгийн гишүүн ашиг сонирхлын зөрчилгүй тухай мэдэгдэл гаргах бөгөөд тэтгэлэг горилогчтой хамаарал бүхий бол тухайн горилогчийн материалыг хянан үзэх, үнэлэх ажиллагаанд оролцохоос татгалзана.

4.3. Ажлын хэсэг тэтгэлэг горилогчийн ирүүлсэн баримт бичгийн бүрдэл, энэхүү удирдамжид заасан шаардлага хангасан эсэхийг хянан үзэж, шаардлага хангасан горилогчийг мэргэжлийн эрэлтийн түвшин, сурлагын амжилт, зорилтот бүлэгт хамаарах байдал, нийгмийн оролцоог харгалзан үнэлж, эрэмбэлнэ. Үнэлгээ нь үндэслэл, нотлох баримтад тулгуурласан байна.

4.4. Тэтгэлэг горилогчдын нийт оноо тэнцсэн тохиолдолд мэргэжлийн эрэлтийн түвшин, сурлагын амжилт, зорилтот бүлэгт хамаарах байдлыг дараалан харгалзан эрэмбэлнэ.

4.5. Тэтгэлэг горилогч сонгон шалгаруулалтын дүнг нийтэлсэн өдрөөс хойш ажлын таван өдрийн дотор үнэлгээтэй холбоотой санал, хүсэлтээ аймгийн Засаг даргын Тамгын газарт бичгээр гаргаж болно.

4.6. Засаг даргын зөвлөлийн хурлын тэмдэглэл, саналыг үндэслэн тэтгэлэг олгох суралцагч болон тэтгэлгийн хэмжээг аймгийн Засаг даргын шийдвэрээр баталгаажуулна.

4.7. Сонгон шалгаруулалтын дүнгээр тэтгэлэг авагчийн нэр, сургууль, мэргэжил, нийт оноо, олгох тэтгэлгийн хэмжээг хүний хувийн мэдээлэл хамгаалах шаардлагад нийцүүлэн нийтэд мэдээлнэ.

Тав. Бүрдүүлэх баримт бичиг:

5.1. Ерөнхий боловсролын сургуулийн төгсөгч

- 5.1.1 Батлан даагчийн иргэний үнэмлэхийн хуулбар.
- 5.1.2 Тэтгэлэгт хамрагдах анкет.
- 5.1.3 Иргэний үнэмлэхийн хуулбар.
- 5.1.4 Их, дээд сургуулийн элсэлтийн батламж.
- 5.1.5 Элсэлтийн шалгалтын онооны баталгаажуулсан баримт.
- 5.1.6 Бүрэн дунд боловсролын үнэлгээний лавлагаа.

5.2. Их, дээд сургуулийн оюутан

- 5.2.1 Батлан даагчийн хүсэлт.
- 5.2.2 Тэтгэлэгт хамрагдах анкет.
- 5.2.3 Оршин суугаа газрын бүртгэлийн түүхчилсэн лавлагаа, эсхүл Дорноговь аймагт ерөнхий боловсрол эзэмшсэнийг нотлох баримт
- 5.2.4 Суралцаж буй сургуулийн тодорхойлолт.
- 5.2.5 Голч дүнгийн тодорхойлолт.
- 5.2.6 Ёс зүйн зөрчилгүй тухай тодорхойлолт.
- 5.2.7 Иргэний үнэмлэхийн хуулбар.
- 5.2.8 Нийгмийн оролцоо, эрдэм шинжилгээ, спорт, урлаг, сайн дурын үйл ажиллагааны нотлох баримт.

Зургаа. Талуудын эрх, үүрэг:

6.1. Аймгийн Засаг даргын Тамгын газар болон тэтгэлэг авагч хоёр талт тэтгэлгийн гэрээ байгуулна. Тэтгэлэг авагч нь гэрээгээр хүлээсэн үүргээ биелүүлэх үүрэгтэй.

6.2. Гэрээнд тэтгэлгийн хэмжээ, сургалтын байгууллагын дансанд төлбөр шилжүүлэх нөхцөл, сурлагын түвшин, тайлагнах үүрэг, дадлага хийх нөхцөл, төгссөний дараа Дорноговь аймагт мэргэжлээрээ ажиллах хугацаа, хүндэтгэн үзэх шалтгаан, гэрээг түдгэлзүүлэх, дуусгавар болгох, тэтгэлгийг нөхөн төлүүлэх үндэслэл, нөхөн төлбөр төлөх данс болон маргаан шийдвэрлэх журмыг тодорхой тусгана.

6.3. Тэтгэлэг авагч нь гэрээний хэрэгжилтэд нөлөөлөх нөхцөл байдал үүссэнээс хойш 14 хоногийн дотор аймгийн Засаг даргын Тамгын газарт мэдэгдэж, холбогдох баримт бичгийг ирүүлнэ.

6.4. Аймгийн Засаг даргын Тамгын газар гэрээний хэрэгжилтэд хяналт тавьж, төгсөгчид мэргэжилд нь нийцсэн сул ажлын байрны мэдээлэл хүргэх, ажил олгогчтой холбох дэмжлэг үзүүлэх үүрэгтэй.

6.5.Тэтгэлэг олгосон нь төгсөгчийг төрийн албаны болон бусад ажлын байранд сонгон шалгаруулалтгүйгээр томилох, ажилд авах үндэслэл болохгүй.

6.6. Батлан даагч нь тэтгэлэг авагчийн гэрээгээр хүлээсэн үүргээ биелүүлээгүй тохиолдолд Иргэний хуульд нийцүүлэн бичгээр байгуулсан батлан даалтын гэрээнд заасан нөхцөл, хугацаа, хэмжээгээр хариуцлага хүлээнэ.

ДОЛОО. ТЭТГЭЛГИЙГ ТҮДГЭЛЗҮҮЛЭХ, ДУУСГАВАР БОЛГОХ

7.1.Дараах тохиолдолд нөхцөл байдлыг тодруулах, зөрчлийг арилгах хүртэл тэтгэлгийн дараагийн санхүүжилтийг түр түдгэлзүүлж болно:

- 7.1.1.сургалтын чөлөө авсан;
- 7.1.2.голч дүн энэ удирдамжид заасан шаардлагыг хангахгүй болсон;
- 7.1.3.ирүүлсэн баримт бичиг, мэдээлэлд зөрүү илэрсэн;
- 7.1.4.гэрээнд заасан тайлан, баримт бичгийг хугацаанд нь ирүүлээгүй;
- 7.1.5.гэрээний үүргийн зөрчил гаргасан бөгөөд уг зөрчлийг арилгах боломжтой гэж үзсэн.

7.2.Тэтгэлэг авагчид тайлбар, нотлох баримт гаргах боломж олгосны дараа дараах тохиолдолд тэтгэлэг олголтыг цуцалж, гэрээг дуусгавар болгоно:

- 7.2.1.сургуулиас хасагдсан;
 - 7.2.2.хүндэтгэн үзэх шалтгаангүйгээр сургалтаа бүрмөсөн орхисон;
 - 7.2.3.хуурамч баримт бичиг, худал мэдээлэлд үндэслэн тэтгэлэг авсан нь тогтоогдсон;
 - 7.2.4.сургалтын байгууллагын эрх бүхий этгээдийн эцсийн шийдвэрээр ёс зүйн ноцтой зөрчил гаргасан нь тогтоогдсон;
 - 7.2.5.зөрчлийг арилгах талаар мэдэгдэл хүргүүлсэн боловч тогтоосон хугацаанд гэрээний үүргийн зөрчлийг арилгаагүй;
 - 7.2.6.гэрээгээр хүлээсэн үүргээ хүндэтгэн үзэх шалтгаангүйгээр ноцтой зөрчсөн.
- 7.3.Тэтгэлгийг түдгэлзүүлэх, цуцлах болон гэрээг дуусгавар болгох үндэслэл, нөхцөл байдлын талаар тэтгэлэг авагчид урьдчилан мэдэгдэж, тайлбар, нотлох баримт гаргах боломж олгоно.

7.4.Тэтгэлгийг түдгэлзүүлэх, цуцлах болон гэрээг дуусгавар болгох шийдвэрийг үндэслэл бүхий бичгээр гаргаж, тэтгэлэг авагчид хүргүүлнэ.

НАЙМ. АЖИЛЛАХ ҮҮРЭГ БА НӨХӨН ТӨЛҮҮЛЭЛТ

8.1.Тэтгэлэг авагч төгссөнөөс хойш Дорноговь аймагт мэргэжлээрээ ажиллаж эхлэх бөгөөд:

- 8.1.1.ерөнхий боловсролын сургууль төгсөгч тэтгэлэгт хамрагдсан бол таваас доошгүй жил;
- 8.1.2.их, дээд сургуульд суралцаж байх хугацаандаа тэтгэлэгт хамрагдсан бол 3-аас 5 жил ажиллана.

8.2. Аймгийн Засаг даргын Тамгын газраас төгсөгчид мэргэжилд нь нийцсэн ажлын байрны мэдээлэл өгөх, ажил олгогчтой холбоход дэмжлэг үзүүлэх үүрэг хүлээнэ.

8.3. Тэтгэлэг авагч хүндэтгэн үзэх шалтгаангүйгээр гэрээгээр хүлээсэн суралцах болон ажиллах үүргээ биелүүлээгүй, мэргэжлээрээ ажиллахаас татгалзсан, эсхүл тогтоосон хугацааг бүрэн ажиллаагүй бол олгосон тэтгэлгийг нөхөн төлнө.

8.4. Нөхөн төлүүлэх тэтгэлгийн хэмжээ, төлөх хугацаа, хэлбэр, талуудын хариуцлага болон үүргийн биелэлтийг баталгаажуулахтай холбоотой харилцааг тэтгэлэг олгох гэрээгээр нарийвчлан зохицуулна.

ЕС. ХЯНАЛТ, ТАЙЛАГНАЛ, ИЛ ТОД БАЙДАЛ

9.1.Аймгийн Засаг даргын Тамгын газрын Төрийн захиргааны удирдлагын хэлтэс нь тэтгэлгийн гэрээ, ажил эрхлэлт болон нөхөн төлөлтийн нэгдсэн бүртгэл хөтөлж, гэрээний хэрэгжилтийг хянан, ажил эрхлэлт, үр дүнг жил бүр нэгтгэн тайлагнаж, нийтэд мэдээлнэ.

Тэтгэлэг авагчийн сургалтын үеийн сурлагын явц, төгсөлтөд Нийгмийн бодлогын хэлтэс, сургалтын байгууллагад шилжүүлсэн санхүүжилтийн баримтад Санхүү, төрийн сангийн хэлтэс тус тус хяналт тавина.

9.2.Тэтгэлгийг зориулалт бусаар зарцуулах, сонгон шалгаруулалтын үйл ажиллагаанд хууль бусаар нөлөөлөх, ашиг сонирхлын зөрчилтэй этгээдийг үнэлгээнд оролцуулах, тэтгэлэг горилогч болон тэтгэлэг авагчийн хувийн мэдээллийг зориулалтын бусаар ашиглах, задруулахыг хориглоно.

9.3. Энэхүү удирдамж болон тэтгэлгийн гэрээг зөрчсөн этгээдэд холбогдох хууль тогтоомжид заасан хариуцлага хүлээлгэнэ.

9.4. Энэхүү удирдамжид тусгагдаагүй асуудлыг холбогдох хууль тогтоомж, орон нутагтай хамтран ажиллах болон нийгмийн хариуцлагын гэрээ, тэтгэлэг авагчтай байгуулсан гэрээний дагуу шийдвэрлэнэ.

---o0o---

Дорноговь аймагт шаардлагатай хүний нөөцийн тэргүүлэх чиглэл:

№	Салбараар	Мэргэжил
1	2	3
1	Уул уурхай, эрдэс баялгийн салбар	Уул уурхайн инженер
2		Программ хангамжийн инженерчлэл
3		Инженер геологи, геотехникч
4		Газрын тосны инженерчлэл
5		Байгаль хамгааллын технологич
6	Дэд бүтэц, эрчим хүч, зам тээврийн салбар	Цахилгаан эрчим хүчний инженер
7		Автоматжуулалт, электроникийн инженер
8		Нисэх техникийн механик /инженер/
9		Мэдээлэл, харилцаа холбооны инженер
10		Логистик менежмент
11		Сэргээгдэх эрчим хүч
12		Механик, төмөрлөгийн инженер
13		Машин механизмын инженер
14		Барилгын инженер
15		Хот төлөвлөлтийн мэргэжилтэн
16		Газар зохион байгуулалтын инженер
17	Хүнс, хөдөө аж ахуйн салбар	Агрономич
18		Малын эмч
19		Хүнсний чанар, аюулгүй байдал
20		Хөнгөн үйлдвэрийн технологич
21		Усны нөөц, усжуулалт
22	Нийгмийн салбар	Эмч, сувилагч
23		Багш

Дорноговь аймагт шаардлагатай хүний нөөцийн эрэлттэй мэргэжил

№	Салбараар	Мэргэжил
1	2	3
1	Эрүүл мэндийн салбар	Их эмч
2		Сувилагч
3		Эх баригч
4		Сэтгэцийн эмч
5		Дүрс оношилгоо
6	Боловсролын салбар	Багш, бага боловсрол
7		Багш, Англи хэл, гадаад хэл
8		Багш, хөгжмийн боловсрол
9		Багш, байгалийн ухаан
10		Багш, дизайн технологи
11		Багш, Монгол хэл
12		Сэтгэл зүйч
13		Хоол зүйч
14	Бусад	Ашигт малтмалын баяжуулалтын технологи
15		Хиймэл оюун ухаан
16		Хаягдал боловсруулах технологи
17		Утасгүй холбооны инженерчлэл
18		Хот ба бүс нутгийн төлөвлөлт
19		Аялал жуулчлал
20		Зүтгүүрийн машинист
21		Арьс боловсруулах технологи

---o0o---